



Synfocity = 698

mail us at : mzsynfo@gmail.com; mizoramsynod@gmail.com - Phone - 2314648

August 16, 2018

□ Pu Robert-a Sùna inkhawm

Aug. 13, 2018 (Thawhtanni) chawhnu dar 3:00 khan Mizoram Synod buatsaihin Pu Robert-a (Rev. Dr. Alwyn Roberts) sùna inkhawm Mission Veng Kohhran Biak Inah neih a ni.

Sùna Inkhawm hi Rev. Lalzuithanga, Ex-Moderator in kaihruaiin thuchah a sawi a. Rev. R. Vanlalnghaka, Secretary (Jr.), Mizoram Synod leh Upa Dr. Tawnenga, Principal, Pachhunga University College ten Pu Robert-a chanchin an sawi bawk. Mizoram Synod Choir te an zai a, Rev. H. Remthanga, Finance Officer-in ÷awngtaisakna hun a hmang a, Rev. R. Lalnuntluanga, Synod Statistician-in malsawmnain inkhawm a ÷in a ni. Hemi ni vek tlai dar 5:30-ah Pu Robert-a lawina Kohhran, Berea Newydd Chapel, Bangor-ah a vuina inkhawm neih a ni a. UK leh Wales-a Mizo awmte mi 20 chuanging an hmanpui a ni.

□ FG&CC buatsaih Counselling Training wawi 29-na

Mizoram Synod Family Guidance & Counselling Centre (FG&CC)-in Kohhran hruaitute puala Aug. 1 - 15, 2018 chhunga Synod Conference Centre-a Church Leaders' Intensive Residential Pastoral Care & Counselling Training wawi 29-na a buatsaih chu August 14, 2018 (Thawhlehi) zan khan 'Final Evaluation & Graduation Service' neih khar a ni.

Training kharna hun hi Rev. Lalsangbera, Director, FG&CC-in a kaihruai a, Rev. R. Lalnuntluanga, Synod Statistician-in training chhuakte hnenah certificate (?) a sem a, Upa R. Lalmalsawma, Com. Member, FG&CC chuan fuihna thuchah a sawi. He Counselling Training-ah hian Pastor Bial 7 leh Phai Synod, Myanmar a ÷angin Kohhran aiawh 23 an tel a ni.

Training kharna inkhawmah hian Training chhuakte chuan training an hlawkpui dan a lema an ziaik chu entirin an hrilhfiah a, Upa C.L. Thantluanga, Mamit chuan training chhuakte aiawhin thu a sawi a. Bungkawn Pastor Bial Zaipawl te ÷um 2 zaiin, Upa Lalhuapzauva, Com. Member, FG&CC chuan Training chhuakte a ÷awngtaisak a ni.

Thuchah sawitu, Upa R. Lalmalsawma chuan training chhuakte fuihna thu sawiin, training chhuakte chuan an thil zirte chu ÷angkai taka hmang turin a fuih a. "Keimahni chàk vang leh thiam intih vang ni lovin Lal Isuan min thlan avanga rawngbawl hna thawk kan ni a. Midangte tana malsawmna ni tur chuan thuawih leh tlawmna nun neih a ngai a ni" a ti.

FG&CC hian Pastor-te pualin Pastoral Care & Counselling Training hi wawi 27 buatsaih tawhin, Pastor 461 training a neihpui tawh a. Church Leader-te puala kum 2002 a ÷anga training a neihpui tawhah, tun ÷uma mite nen hian Kohhran hruaitu 599 Training pek an ni tawh bawk a ni.

Synod hian Counselling Centre pasarih - Mission Veng, Bawngkawn, Vaivakawn, Champhai, Serchhip, Kolasib leh Lungleiah te a nei a, 2019 kum tir lamah hian Mamit-ah Centre hi hawn belh tura ruahman a ni bawk. Heng Counselling Centre pasarihah hian tun thlenga pantu (client) an neih tawh zat chu mi 23,052 an ni.

□ Pastor Refreshers' Course programme

Aug. 10 - 20, 2018 chhung hian Pastor Refresher Course programme-in Church of South India Synod tlawhin Pastor 10 an kal a. Church of South India Synod huam chhunga Kohhran hrang hrangte zirchiang leh tlawhin hun an hmang a ni. Pastor Refresher Course programme a kalte chu -

1. Rev. C. Zoramawia, Administrative Secretary, Manipur
2. Rev. R. Lalmingsanga, Diakkawn
3. Rev. F. Lalhmingthanga, Aibawk
4. Rev. R.C Lalnghakliana, Administrative Secretary, Lunglei
5. Rev. Lalmachhuana, Bethlehem Venglai
6. Rev. Vanlalmuanpuia Khiangte, Bawngkawn Bethel
7. Rev. C. Lalduhawma, Chanmari, Lunglei
8. Rev. K. Lalrammawia, Chaplain Falkawn
9. Rev. R. Lalremruata, Thenzawl Field Veng
10. Rev. C. Lalremruata, Kawnpui

□ SL&PB

Aug. 18 & 19, 2018 chhung hian Biate Bialah Literature Seminar neih a ni a, Seminar neihpui hian Rev. Dr. C. Chawngmingliana, Editor, SL&PB, Pu Lalhruaitluanga, General Manager, PRESCOM leh Pu Lalniliana, Manager, Bookroom te an kal a, Champhai Bookroom branch tlawh nghalin bookroom ram an enfel nghal ang.

□ Zin

Aug. 18 - 19, 2018 chhung hian Ratu Pastor Quarters hlanna programme hmanpui turin Rev. Lalramliana Pachuau, Senior Executive Secretary a kal ang.

Contd...

- ❑ **MSSU**
 - ♦ Aug. 18, 2018 (Inrinni) hian Zobawk Bialah Sunday School zirtirtu training neih a ni a, MSSU atangin Upa Lalmuanpuia, MSSU Coordinator leh trainer Upa B. Lalhmunliana, Bethlehem Venglai te an kal ang.
 - ♦ Aug. 18, 2018 (Inrinni) hian Hnahthial Bialah Sunday School zirtirtu training neih a ni a, MSSU trainer te - Upa S. Kapzathanga, Armed Veng South leh Upa C. Lalbiaksanga, Zemabawk North te an kal ang.
- ❑ **Synod Hospital, Durtlang**

Aug. 10, 2018 (Zirtawpni) khan Synod Hospital Eye Unit hmalakna Community Based Rehabilitation (CBR) Programme-in Rawpuichhip-ah Cataract Screening Camp neih a ni a, mi 92 en an ni a, Cataract zai tur 16 hmuh chhuah an ni a, Hospital lamah enkawl chhunzawm tura hriattir an ni. He mi rual hian hmeichhe lam (Gynae) Doctor leh Nurse pakhat an kal tel a, hmeichhia kum 30 - 60 inkar mi 38 an en bawk.
- ❑ **Worship Deptt.**

Aug. 9 - 11, 2018 chhung khan Ramhlun Vengthlang Kohhranah Zai hruai training neihpuiin Pu Lalromawia, Senior Instructor a kal.
- ❑ **Synod Social Front**

Aug. 18, 2018 (Inrinni) hian Thingdawl Bialah Political Education Seminar leh Campaign neih a ni dawn a, Resource Person-te Upa Lalzuithanga leh Upa Dr. Vanlalzara te an kal ang.
- ❑ **KTP**

Aug. 17 - 19, 2018 chhung hian Kawnpui Venglai Branch-ah Leadership Training neih a ni dawn a, Central KTP atangin Committee Member-te Pu Rorelkima leh Pu Malsawmtluanga te an kal ang.
- ❑ **Revival Deptt.**

Synod Revival Speaker-ten hetiang hian Camping/Crusade neiin hun an hmang ang:

Aug. 14 - 19, 2018	R. Lalhruaimawia, Speaker	JM High School, Sairang	Camping
Aug. 18 - 26, 2018	Lalremruata, Speaker	Shillong Kohhran	Camping
Sept. 2 - 9, 2018	Lianthangpuii, Speaker	Vangchhia Kohhran	Crusade
Sept. 25 - 29, 2018	Lianthangpuii, Speaker	E. Phaileng Kohhran	Campaign
- ❑ **Campus Ministry**

Aug. 14, 2018 (Thawhlejni) khan Govt Aizawl College-ah hun an hmang a, Aug. 16, 2018 (Ningani) hian Aizawl West College-ah hun an hmang leh a ni.
- ❑ **Synod-in chhawmdawlina pe**

Tun hnaia harsatna hrang hrang neite hnenah Synod Relief Fund atangin chhawmdawlina hetiang hian pek an ni.

S.No	Khua	Pek chhan	Chhungkaw zat	Chhawmdawlina pek zat
1.	Thaidawr Tlangveng Biak In	Leimin tuar	-	Rs. 40,000/-
2.	Thaidawr Tlangveng	Damlo	1	Rs. 8,000/-
3.	Darlâk	Damlo	1	Rs. 8,000/-
			TOTAL	Rs. 56,000/-
- ❑ **Synod Moderator**

Lung (heart) lamah insawiselna a neih avangin Synod Hospital-a enkawl a nih hnuah phai lam kal turarawn a nih angin August 8 khan Birla Heart Research Centre, Kolkata an pan a. A thisen dawt tihzau nan hmun li-ah a tihzauhna (stent) vuah a ni a. August 15 khan dam takin Aizawl a lo thleng leh. August 16 Synod Officers Meeting pawh a kaihrui thei nghal a ni.
- ❑ **Hruaina Eng FM Radio**
 - ♦ **AUGUST 17, 2018 (FM Zoawi Aizawl & FM Lunglei @ 7:30 p.m.):**
 Zaipawl : Besy Choir - Jehova, Group Zai : One in Christ - Lalpa phut, Thusawi : Rev. Lalchhuanmawia - Chanchin tha hril, Kohhran hnapui, Zaipawl : Mizoram Synod Choir - Keini zawng, Solo : Feli Feli - Lalpan a pui ang che
- ❑ **Hruaina Eng TV Programme**

Susamachar Prasaran Programme

 - ♦ **AUGUST 19, 2018 (Pathianni) 5:00 pm. :**
 Group/Choir/Solo : Central PYF Choir - Krus Par, Group/Choir/Solo : Kristian Centre Zaipawl - Hawale, Sermon : Rev. David Lalramliana Ralte - Hum Parmwshwar ke santaan, Group/Choir/Solo : Soni Lalnunsangi - Ashantima, Group/Choir/Solo : LH Hindi School - Yeshu MASIH
 - ♦ **AUGUST 19, 2018 (Tv Programme) @ 4:00 - 6:00, 8:00 - 9:00 p.m) :**
 Sermon : Rev. C. Lianhmingthanga - Lal Isua lo kal chhan, Weekly Round Up, Sawihona : Kohhran leh Politics - I

Kohhran Pavalai Pawl (KPP) inkaihhraina



Kohhran Pavalai Pawl Flag leh Logo hrilhfiahna.

1. Flag chungchang.

- 1) Kil li nei a ni ang.
- 2) A vang lam chu a dunglam hmun thuma thena hmun hnih (2/3) a ni tur a ni.
- 3) Rawng chi khat a ni ang a, a rawng atan rangkachak rawng (Creammy Gold Paint color) a ni ang a. Hei hian chhungkuua pavalai te pawimawhna, hlutna leh thuneihna a entir a ni.
- 4) Flag laiah KPP Logo(Emblem) dah tur a ni a. Chumi hnuai lamah Kohhran/Pastor Bial hming hawrawp дума ziah tur a ni ang.
- 5) A hlai zawng chu chi thuma siam theih a ni ang a. A hlai Ber chu khaikhawmtu committee flag a ni ang a, Ft. 4x6 a ni ang. A dawttu chu Pastor Bial leh Kohhran mal flag a ni ang a, Ft 2.5x3.9 a ni ang. Tin, motora tar leh tul danga hman atan te deuh zawk, 6Inch.x9 Inch. a siam tur a ni ang.

2. Logo (Emblem) chungchang.

- 1) Logo hi size hrang hranga siam theih a ni ang a, a pian hmang erawh tihdanglam loh tur a ni ang.
- 2) Rin bial siamna, a tlang a дума rin chung hi rawng dum pawl hman tur a ni.
- 3) Rin bial chung bik background hi gray colour hman tur a ni ang.
- 4) Thuro thlawk lai hian Thlarau Thianghlim kan zinga thawk a, min hmu rengtu leh tiharh thar thintu a nih a entir.
- 5) Biak In leh Kraws hian Kohhran leh a rawngbawlna a ngaih pawimawhzia a entir.
- 6) Bible in keu leh meialh hian Pathian thua innghat chung zela chhungkaw maichama mei chu a mit tur a ni lo tih a entir.
- 7) Rin bial in zawm lohna laia bial pathum awm hian Kohhran Pavalai te thil tum pathum a entir.
- 8) Rin bial hnuai lamah hian Logo neitu chu Kohhran Pavalai Pawl a ni tih tarlan a ni a. Ribbon a thangchhuah diar hman hian Krista tana thangchhuah tur kan ni tih a entir.
- 9) Rin bial chung chung lama Thlarau Thianghlim entirna Thuro chung a KPP thupui ziah hian Thlarau Thianghlim puihnaa Krista tana nung tur kan ni tih a entir.

Residential Choir Conductors' Training chungchang hriattirna

Synod Worship Department chuan August 27 - 31, 2018 chhungin Synod Conference Centre-ah Residential Choir Conductors' Training a buatsaih dawn a. He huna tel duhte tan August 23, 2018 (Ningani) 3:00 p.m. thleng dil theih a ni. Dilna form hi Synod Worship Office atanga lak theih a ni. August 24, 2018 (Zirtawpni) ah tel turte hming tar a ni ang. Hemi chungchanga hriat chian duh nei chuan a hnuai contact number-ah emaw Worship Office-ah zawhfiah theih a ni ang.

Contact : Upa H. Lalhmingmawia, Co-ordinator - 9774636495
Pu Lalromawia, Senior Music Instructor - 9862310203

Sd/-
(REV. B. SANGTHANGA)
Executive Secretary i/c Worship

Choir Conductor Training diltute tana hriat tur :

1. Training hi August 28-31, 2018 chhungin Synod Conference Centre-ah neih tur a ni.
2. Training dilte tan August 23, 2018 (Ningani) 3pm thlengin Synod Worship Department-ah dilna theh luh theih a ni ang.
3. Training tura thlante hming chu August 24, 2018 (Zirtawpni) 11 a.m -ah tar chhuah a ni ang a, www.mizoram synod.org/notification atanga en theih a ni bawk ang.
4. August 28, 2018 (Thawhlejni) 5pm-ah training tura thlante chuan Synod Conference Centre thlen hman ngei tur a ni ang a. Centre-ah hian zanriah ei nghal tur a ni ang a. Zan dar 6:30-ah Pathian hnena training hlanna neih a nih zawhah Class neih tan a ni ang.
5. Trainee-te tan mut bu ken a ngai lo vang. Bible erawh ken ngei tur a ni ang.
6. Trainee te TA/DA (Synod rate) pek an ni ang a, Ei leh in tum sak an nih dawn avangin tan ni atangin ni khatah training chhungin DA Rs. 100/- pek an ni ang.

Synfo Praise On 2018 chungchang Hriattirna

Praise On 2018 hi Kristian Thalai Pawl Bial/Branch behchhanin Beat Group Intihsiakna anga kalpui tur a ni a. A kalphung tur hetiang hi a ni:

a) TEL DAN TUR :

1) Kristian Thalai Pawl (KTP) Branch emaw Bial emaw aiawh tur Beat Group 2 aia tam lo an tel thei ang.

2) Beat Group pakhat-ah member 6 aia tam lo an awm thei ang.

3) A tel turte chu KTP Member, Kohhran dan chhunga awm, rawngbawlanaa hman chhonzawm theih tur ni se.

b) ROUND AWM DAN TUR :

1) Round 3 a awm dawn a, Round 1-ah hian Group tinin minute 10 aia rei lo hun an nei ang a; hei hian instruments siam rem chhung leh an zai zawh hun thleng a huam ang.

c) INSTRUMENTS :

1) Tingtang (Guitars), Keyboard leh Drums te chhawp sa a ni dawn a. Guitar leh Keyboard hi mahni ta hman duh tan a hman theih baw ang.

d) A hun leh hmun

1) Hming pek luh hun hnunung : September 7, 2018 thleng.

2) 1st Round : September 18-21, 2018 (Chhun lam)

2nd Round : October 16-19, 2018

Final Round : November 6-9, 2018

e) A hmun : 1st Round hi Synfo Studio-a neih tura ruahman a ni a. A bak hi chu la ngaihtuah leh tura dah a ni. Synfo Praise On 2018 Intihsiakna kalphung tur hriattirna hi Kristian Thalai Pawl Bial leh Branch hrang hrangah thawn chhuah mek a ni.

SYNOD SOCIAL FRONT HRIATTIRNA

1. Synod Charity Store

Synod Social Front chuan Synod thu bawhzuiin chhungkaw neining zawkten an thuamhnaw leh bungrua la hman tlak si, an hman tangkai tawh lem loh te leh an thil neih remchang apiang an thekawm a, mi harsa zawkten an lo hman tangkai theih dan tur kawng a ngaihtuah a. Chumi atan chuan Synod Charity Store, Zosaphara Building, First Floor (MS-II/25&26) Mission Veng-ah hawn a ni a.

Synod Charity Store-a dah tur hian thawnaw hak chi leh sin tur chi te, bungbel te, furniture leh lehkhabu te rawn thawh khawm turin Kohhran hrang hrangte a inchhawkin ngen thin an ni. Kohhranhote rawn thawhkhawm chu pakhat Rs. 100/- aia to lovin hralh ve thin a ni a, bungraw hlu bik deuh erawh chu Rs. 100/- aia tam deuh chhiar ve thin a ni baw. Heng bungraw rawn thawhkhawm thenkhatte chu Ramthar Field lam te, Kohhran harsa deuh te leh chhiat tawk te hnenah a thlawnin pek thin an ni baw. Charity Store hi nitin, Synod office chawlh ni tih loh chu dar 9:00 A.M. - 5:00 P.M. hawn thin a ni a, Inrinni-ah dar 9:00 - 12:00 noon thleng hawn a ni baw a, a mamawh apiang tan dawr theih reng a ni e.

2. Old Age Day Care Centre (Kum Upa te inkawmhlamna)

Synod Social Front chuan Old Age Day Care Centre (Kum Upa te Inkawmhlamna hmun) Synod Conference Centre, Ground Floor-ah kum lama upa tawh, thian kawm duh te kalkhawm a, an inkawmhlamna theihna tur a buatsaih a. Kalkhawmte tan infiamna turte leh lehkhaha chhiar tur te chhawpsak an ni a, an ei leh in turte ngaihtuahsak thin an ni baw a. A remchan dan angin Pathian thu lama inkawmna te pawh neih thin a ni.

Chawhma lam dar 10:30-ah Hunserh hmanpui thin an ni a, tlai lam dar 3:00 thleng hawn thin a ni.

Old Age Day Care Centre-ah hian mi engemawzat an kalkhawmin an inkawm hlim thin a, mi thenkhat kalharsat deuh te chu an chhungten an rawn hruai bawk thin. Heta kal awm mi kan hriat te chu kawhhmuh thin turin kan inngen bawk e.

**Executive Secretary
i/c Synod Social Front**

HRIATTIRNA

Synod rorel bawhzuiin tunah hian Bawngkawn Synod Bookroom pawnah Letter Box dah a ni a, lehkhaha pawimawh Synod Office thleng tur chiah dah tur a ni a, Synod Office ni lo, Deptt. dang thleng tur erawhchu dah a remchang lo a ni. Letter Box hi kar tin Nilaini leh Zirtawpni-ah te hawn thin a ni dawn a ni.